



EDITORIAL


Nagkakaurusa an katawhan ngan rebolusyunaryo nga kagiusan ha ika-51 nga anibersaryo han Partido

MAHINUNGANON NGA IGINSELEBRAR han katawhan ngan han rebolusyunaryo nga kagiusan an ika-51 nga anibersaryo han Partido hadton Disyembre 26. Kahuman liwat ini han usa katuig han damo nga mga bagyo. Hini pa la nga Disyembre, magkasunod nga ginlasurbo an Eastern Visayas han mga bagyo nga Tisoy ngan Ursula. Kahuman liwat ini han maiha nga kathuraw nga nakahibang ha panginabuhin han masa nga parag-uma. Pero an pinakagrabe nga kalamidad amo an hinimuan han tawo: an ginpapintas nga atake ha katawhan han pasista, niyutiyo ngan dunot nga rehimen US-Duterte.

Ha luyo hini ngatanan, iginpakita han katawhan ngan han rebolusyunaryo nga kagiusan an kamaisog, kamaailob ngan determinasyon nga atubangon ngan ungbawan an mga ulang ha pagsulong. Waray bisan usa nga prente gerilya nga nabungkag han ginpapintas nga opensiba han kaway. Nahiagum liwat an pasista nga kaway han pira kapilo nga kaswalti itanding ha Bagong Hukbong Bayan. Padayon nga natinog ngan nakikigbisog an demokratiko nga kagiusan masa.

Sanglit, dako an kalipay han

katawhan ngan rebolusyunaryo nga kagiusan ha pagselebrar han ika-51 nga anibersaryo han Partido. Mabinantayon ngan militante nga ginpapatuman han BHB an ukoy-buto nga magpaluyo nga gindeklarar han National Democratic Front of the Philippines ngan Gubyerno han Republika han Pilipinas hini nga Disyembre 23 tubtub Enero 7. Nabulig an BHB ha katawhan kahuman han magkasunod nga bagyo hini nga Disyembre ngan ha pangandam ha nagpapabilin nga mga larang han rehimen US-Duterte para ha balaud militar ngan pasista nga paghahadi. Gin-aatubang han Partido, BHB ngan masa han katawhan an bag-o nga tuig nga puno hin kaisog nga papintason ngan ipasulong an demokratiko nga rebolusyon, ngan pabagsakon an pasista, niyutiyo ngan dunot nga rehimen US-Duterte. ■



Anibersaryo han PKP, ginselebrar

HUL-OS NGA KARAYHAK nga ginselebrar han rebolusyunaryo nga kagiusan ngan han hiluag nga katawhan han Eastern Visayas an ika-51 nga anibersaryo han Partido Komunista ng Pilipinas ha mga selebrasyon hini nga Disyembre.

Ha Northern Samar, diri mamenos ha upat nga selebrasyon an ginhimo ha mga prente gerilya. Ha selebrasyon nga ginhimo mismo hadton Disyembre 26, umabot ha 400 an tumabong nga Pula nga mangaraway, parag-uma, ngan mga tikang ha mga bungto ngan syudad. Ginpangunahan han komite ha seksyon han Partido ha lokalidad an aktibidad. Ha programa, ginpanawagan dinhi an pag-andam ha mas mapintas nga pag-atake han kaway ha masa ngan ha BHB, ngan pagpahugot han interklaster nga burubligay kontra hini. Luyo han presensya han kampo han militar ha tabok nga baryo, talwas nga nahuman an mag-aga nga aktibidad.

Ha Western Samar, nagtikang an selebrasyon han usa nga yunit han BHB pinaagi han mga paanyag sugad han "BHB Henyo." Ha sumunod nga pormal nga programa, ginraday ni Ka Orion, kadre han Partido, an magrangat nga mga kadaugan han Partido sakob han masobra 50 katuig. Ginplastar liwat an mga ayat ha Partido agud tapuson an rehimen Duterte ngan pamunuan an rebolusyon ngadto ha mas hitaas nga balitang han pakig-away.

Ginselebrar liwat ha burublag nga mga yunit han BHB ha Leyte an anibersaryo han Partido hadton Disyembre 26-27. Landaw ha programa an mga ginkomposo nga mga kanta ngan luwa han mga Pula nga mangaraway nga inspirado han mabinungahon nga buruhaton rekoberi nira ha erya. ■

Tinuod nga Hukbo han Katawhan

Linya panmasa ha buruhaton rekoberi ha Leyte

HA PAGLUBOG HA masa, ha maisog ngan tangkod nga pagserbe ha ira – dinhi nasantop han mga Pula nga mangaraway ha usa nga prente gerilya ha Leyte an karuyag sidngon han pagigin tinuod nga hukbo han katawhan. Ini an ginkatinnan nira nga pampulitika nga kalamangan ha buruhaton rekoberi ha erya.

Dako na an ginbag-o han ira yunit, sigon kan Ka Lino, lokal nga kadre han Partido. Hini nga 2019, nalubugan nira an ngatanan nga bungto nga sakop han prente. Mas marayhak hira ha trabaho, waray reklamo atubangan han kagipitan ngan mga operasyon han usa ngada duha kakumpanya han sundalo. Dako liwat an ginbag-o han masa tikang ha usa nga pamilya komo inisyal nga kontak hadton syahan nga utro nga gumios an mga kasama ha lugar hadton 2017.

Onse katuig nga waray masumpayan han mga kasama an masa. Antes hini, grabe nga naapektuhan han disorientasyon an rebolusyunaryo nga kagiusan ngan nakahimo han kasaypanan ha isterya nga kontraimpiltrasyon antes an Ikaduha nga Dakila nga Kagiusan nga Pagtutul-id hadton 1992. Ginsingabot ngan ginpadako ini han kaaway, ngan ginpadig-on an erya komo kontra-rebolusyunaryo nga kuta pinaagi han hiluagan nga disimpormasyon ngan pagtanum han mga aset.

Grabe nga kakurian an gin-agian han mga kasama tungod han klima han kahadlok nga gindurot han kaaway. Bisan ano nga pagkumbinser nira, waray naruyag nga makighampang ha ira. Kumita la han tiunob han BHB, nagdadagmit an masa nga magpahibaro ha militar. Pipilion na la nira nga gumikan ha umhanan ngan diri magpakabuhi ha kahadlok nira nga isumpay han kaaway ha BHB. Sigon kan Ka Lino, tiunan-o nira mapupukaw ngan maoorganisa an mga parag-uma kun nadiri ini nga umatubang ha ira?


Gutom, guol, kagipitan ha seguridad ngan kalipungan an mga nagin problema han mga kasama. Diri hira magkasarabot kun tiunan-o dadaupon an masa. Mayda mga nag-alang nga dudaop ha masa tungod kay puros hira diri batid ha tereyn ngan diri sigurado

kun matatapuran an ira mga natudlok nga kontak. Pumungkay an demoralisasyon ngan tipa-tipa ha sakob han yunit, sanglit damo an nagplastar han pag-uli.

Kahuman han usa katuig, gin-ases han pamunuan han Partido an nagin estilo nira ha buruhaton rekoberi. Natudlok nira nga mga kaluyahan an konserbatismo ha pulitiko-militar, ngan labaw ha ngatanan, an harukal nga pagkatin ha prinsipyo han pagigin hukbo han katawhan ngan tangkod nga pagserbe ha masa. Nagsuson hira ha kalugaringon. Nagdesisyon hira nga kinahanglan nira umungbaw, ibalik an ira kamaisog ngan kamahimunan, ngan magpursige ha pagpukaw ha masa ngan pagpasulong han gerra han katawhan.

Syahan anay nira nga ginsolbar an grabe nga kahadlok han masa. Kinahanglan hini han simple, madagmit ngan masayon masabtan nga propaganda nga mag-eeksplikar han mga nagin kaluyahan han rebolusyunaryo nga kagiusan hadto ngan makontra ha pagpakaraut han kaaway. Tiunan-o nira ini ginhihimo? "Kinahanglan naton ini ipakita ha aton gios," sering ni Ka Lino. "Ipaabat naton ha ira an mapaso nga paghigugma han BHB ha masa."

Ginsingabot han mga kasama an kada oras agud bumulig ha masa. Ha kasisidman, bumulig hira ha pagkopras, paglimpyo han mga umhanan, paggabot han butig, ngan pagpanggi. "Maabot 2,000 kaoras han pagtrabaho ha uma an amon ginhihimo hin waray ginlaluman nga kabalyo," sering ni Ka Lino. Pagkaaga, nausa na la an masa nga may naghuman na ngay-an han ira trabaho. Waray ginpili an mga kasama kun



kanay uma an ira bubuligan, ginlakip pa an mga hadto anay ngan presente nga kaapi han CAFGU.

Ha dayuday, umatubang ha ira an mga parag-uma agud magpaabot han ira pagpasalamat. Mahatag pa unta hira han bayad komo kabalyo. Kundi, an gin-aro la han BHB amo an oras nga makihampang ha ira agud mag-eksplikar ngan mag-aro han pasaylo ha mga naglabay nga kasaypanan. Naghatag liwat hira han pampulitika nga edukasyon, ginpukaw an masa ha presente nga kamutangan ngan gin-aghat hira nga pumartisipar ha armado nga pakig-away.

Sumamwak an balita han ginhihimo han mga kasama ngan napanhimuwa an mga pakaraut han kaaway. Para kan Ka Lino, nakit-an han masa nga akos ilubon han BHB an grabe nga sakripisyo para ha kaupayan han masa. Bumalik an pagtapod ha ira han masa. Hinayhinay nga natukod an mga rebolusyunaryo nga organisasyon masa nga napapagios para ha magkalain-lain nga buruhaton.

Yana, nangangandam an yunit nga ikasa han masa an kontrapyudal nga pakig-away kontra ha panlimbong ngan tarha ha timbangan han kopras. Optimistiko hira tungod kay hul-os nira nga naisapraktika an tinuod nga diwa han pagigin hukbo han katawhan. ■